



**ҚАЗАҚСТАН РЕСПУБЛИКАСЫНЫҢ
ҰЛТТЫҚ БАНКІ
№ 32 Б А С П А С Ө З - Р Е Л И З І
2 0 0 6 жылғы 28 қараша**

**«Қаржылық тұрақтылық» атты халықаралық
конференцияның өткізілгендігі туралы**

2006 жылғы 27-28 қарашада Алматы қаласында «Қаржылық тұрақтылық» атты халықаралық конференция өткізілді.

Конференцияны ұйымдастырған Қазақстан Республикасының Ұлттық Банкі.

Конференция жұмысына ТМД, Еуропа, Азия елдері ұлттық (орталық) банктерінің, халықаралық қаржы ұйымдарының (Дүниежүзілік Банк, Еуропалық Комиссия, Еуразия Даму Банкі), Қазақстан Республикасы Қаржы нарығын және қаржы ұйымдарын реттеу мен қадағалау агенттігінің, сондай-ақ Қазақстан Қаржыгерлер Қауымдастығының өкілдері қатысты.

Конференцияға қатысушылар бірінші секция шеңберінде қаржылық тұрақтылықты сақтау мақсатында қаржы секторын дамыту және нығайтудағы орталық банктердің стратегиясы мен саясатының өзекті мәселелерін талқылады, «Банктік дағдарысты болдырмау» атты екінші секция шеңберінде қаржы секторының қарқынды даму жағдайында банктік дағдарысты болдырмау мәселелері қаралды.

Конференция барысында Түркия Республикасы Орталық Банкінің Төрағасы Дурмуш Йылмаз мырза елдегі қаржылық тұрақтылыққа қолдау көрсету үшін орталық банктің, Үкіметтің және қаржы нарығындағы басқа қатысушылардың нақты және бірлесіп жұмыс істеу қажеттігін айтып өтті.

Чехия Республикасы Ұлттық Банкінің Төрағасы орынбасарының кеңесшісі Вит Барта мырза қаржы дағдарысы кезінде Чехия Ұлттық Банкінің кездескен проблемалары туралы айта келе, Қазақстан Республикасының қаржылық реттеу және қадағалау жөніндегі мемлекеттік органдарының мұндай дағдарыстарды болдырмау үшін барлық алғышарттары бар екендігін атап көрсетті.

Конференцияда Еуропалық Комиссияның өкілі Максвелл Ватсон мырза «Өтпелі экономикасы бар бұрынғы елдердегі қиын жағдайларда өтіп жатқан қаржы-кредит ағындары» деген тақырыпта баяндама жасады. Өз сөзінде Ватсон мырза ақша ағындарына, олардың сапасына және Шығыс Еуропа елдерінің экономикасына олардың ықпалын талдай келе, Қазақстандағы ақша ағыны сапасының жоғары деңгейде екендігіне тоқталды. Сондай-ақ «Қаржы секторы.

Ерте ескертудің проблемалары» деген тақырыпқа Қазақстан Қаржыгерлер Қауымдастығының Төрағасы С.А. Аханов мырза баяндама жасады.

Сонымен қатар Конференция шеңберінде «Ресейдің банк жүйесі: қаржылық тұрақтылық және дамуы» деген тақырыпта Ресей Федерациясының Орталық банкі Төрағасының орынбасары Г. Меликьян, «Банктік дағдарыс: нарықтың дәрменсіздігі және қағидаттарға негізделген көзқарас» деген тақырыпта Ұлыбританияның Қаржылық қызметтерді бақылау жөніндегі органы Экономикалық және қаржылық реттеу департаментінің басшысы және Қазақстан Республикасы Қаржы нарығын және қаржы ұйымдарын реттеу мен қадағалау агенттігі Төрағасының орынбасары Е. Бахмутова баяндама жасады.

Конференцияда Қазақстанның қаржы секторында жүргізілген реформалар өздерінің тиімділігін көрсеткендігін және қазақстандық тәжірибені қолдану мақсатында ТМД-да жете зерттеліп жатқандығы атап өтілді.

Жалпы алғанда, өткен жылдары Қазақстанның қаржы секторы өзінің даму жолында біршама жетістіктерге жетіп, тұрақтылығын одан әрі нығайтуға, халықтың және шетелдік инвесторлардың оған деген сенімін күшейтуге ықпал етті.